

# Scola media dil Center da formaziun Surselva ha avegnir

■ **La populaziun dalla Surselva ei surstada dils deficits dils onns vegnents ch'ei vegni presentai avon entgins dis ellas medias. Sco anteriur rectur dalla Scola mercantila Surselva sesentel obligaus da prender posiziun.** La Scola professiunala da commerci e la Scola media ein ina part dil Center da formaziun Surselva. Las duas partiziuns dall'antieriura Scola mercantila vegnan finanziadas differentamein. La Scola professiunala da commerci, definida el profil E, profil M e DHF, ei sutmesssa agl uffeci per la formaziun professiunala. Ella lescha per la formaziun professiunala ei definiu la basa giuridica per la finanziaziun. Tut ils cuosts scadents dalla Scola professiunala da commerci vegnan finanziati dil cantun e las vischnauncas. La partiziun dalla Scola media (Scola commerciala e Scola propedeutica) vegn finanziada tenor la lescha da scola dallas scolas medias cun pauschalas annualas per scolar. Quellas pauschalas muntan à 22 000 francs per scolar. Quella moda e maniera da finanzia favorisescha las scolas grondas cun biars scolars. Scolas ch'ei situadas en regiuns periferas cun cefras demograficas negativas sbattan cun classas pintgas e consequentamein cuvieren las contribuziuns dil cantun buca pli ils cuosts scadents.

Il deficit allegau ellas medias pertucca mo la partiziun dalla Scola media. Quellas cefras sebasan sin il schazetg (Worst Case-Szenarien) e quei senza risguardar las contribuziuns previdas dil cantun. Sche nus lein mantener las Scolas medias pintgas re-



La Scola professiunala da commerci e la Scola media ein ina part dil Center da formaziun Surselva.

MAD

giunalas sto il cussegel grond anflar tier la revisiun dalla lescha da scolas medias in'otra fuorma da finanziaziun. Buca pauschalas per scolars duessen valer per scolas pintgas dalla regiun, mobein las classas duegien vegnir finanziadas. Sco alternativa savess il cantun era dar allas scolas pintgas periferas ina contribuziun da basa.

La damonda centrala ei: Tgei valor han las scolas medias pintgas regiunalas? Per il svilup futuristic dallas regiuns periferas drova ei en mintga cass bunas puschidas da scolaziun. Ina regiun senza scolas professiunals e scolas medias piarda l'attractivitat. La politica (cussegel grond e regenza) ston decider tgei valor

e tgei sustegn che las scolas medias dueien survegnir ellas regiuns periferas (per exempel Surselva ed Engiadina Bassa).

Il svilup demografic dalla Surselva e dil cantun ei per bia vischnauncas e scolas ina vera sfida. Ils responsabels emprovan dapi onns da reagir cun mesiras adattadas per retener la digren. Il Center da

formaziun Surselva a Glion ha introduciu e cumplettau lur puschida culla maturitad da professiun e cun la Scola propedeutica (Varianta da studi direcziun sanadad e novissimamein la partiziun pedagogia). Per reducir cuosts dess ei era la pusseviltad da collaborar meglier denter la Scola media mercantila e la Scola commerciala cun maturitad. Omisduas partiziuns han la medema finamira commerciala. (certificat per la qualificaziun da commerciant/a e la maturitad professiunala da commerciant/a). Personalmein deploreschel jeu ch'il cantun ha entochen oz aunc buca lubiu quella collaboraziun!

Las lavurs da planisaziun per la scola media d'informatica ein terminadas. Il cussegel grond decida aunc uonn, tgei scolas che astgan realisar quella partiziun. Jeu sperel che la politica e lur responsabels realiseschien la situaziun dallas regiuns periferas e sustegnien la realizaziun per quella nova pusseviltad da formaziun a Ftan ed a Glion.

Jeu gjavischel ferventamein ch'ei reuseschi als responsabels da possibilitar la finanziaziun d'ina classa cumbinata cun scolaras e scolars dalla Scola media propedeutica, dalla Scola media mercantila e dalla Scola media d'informatica. Per il svilup dalla Surselva eis ei decisiv, gie quasi ina damonda d'existenza da saver mantener nossa Scola media mercantila. Biars geniturs ein engrazievels che lur affons san far la scolaziun en ina scola pinta, periferas, bein organisada e familiara.

Iso Tuor, Glion

## Fideivels agl uaul ed al revier

Vischnauncas Falera e Schluein han undrau Sigi Andreoli

■ **(anr/abc) Entraus en piazza era el igl 1. da fevrer 1988. E finiu quella ha el ils 31 da december 2013. Duront 25 onns ha il selvicultur Sigi Andreoli da Ladir giu quitau dils uauls dallas treis vischnauncas Ladir, Falera e Schluein. L'jamna vargada han las suprastonzas communalas da Falera e Schluein undrau e priu cumiau dad el.** Cu el ha entschiet haveva il cantun reorganisau ils reviers. Il giuven selvicultur, carschius si e domiciliaus a Cuera, era s'interessau per la piazza scretta ora si en Surselva. Ed ins ha eligiu il sco emprem selvicultur dil

niev Revier forestal Ladir ch'ins haveva formau ord il territori d'uaul dallas treis vischnauncas Ladir, Falera e Schluein. El ei vegnius ella Foppa, cheu ha el empriu in perfetg romontsch ed ei daventau avon rodond 15 onns successur dad *Andreas Maissen* sco president communal da Ladir. *Sigi Andreoli* ha surpriu la responsabladad per la tgira e la cultivaziun d'ina surfatscha d'uaul da rodond 600 hectaras. Igl ei stau ina pulita sfida.

### Organisau l'avertura dil territori

El center dalla gronda surfatscha ei la Val

da Schluein che fa dapi tschantaners quitaus alla populaziun ed allas instanzas. Il territori dil revier Ladir cumpigliava oravontut surfatschas cun uaul da schurmetg ch'ei buca schi semplas da cultivar. Ils uauls s'extendan naven dalla Val da Tschéssas el nord cullas spundas teissas e spuretgas sin territori da Falera e Ladir. Igl ei in uaul cun enornas plantas ed igl ei buca stau sempel d'organisar ils tagls. La vischnaunca da Schluein ei baghegiada sil cugn dil material che seru-schna cuntinudamein giu dils aults cun ina topografia detg malruasseivla. In ure-

zi vehement sa caschunar ina catastrofa dalla natira e periclitat funs e habitadis. Sigi Andreoli ei vegnius confruntaus cullas bovas dil november 2002 e digl uost 2005. Ina cultivaziun effectiva da quei uaul da schurmetg ei d'impurtonza decisiva. Senza vias ei quei nunpusseivel. Ei fa buca surstar ch'il selvicultur da Ladir ha savens stuiu organisar transports da lenna cun agid dil helicopter. Avon 25 onns eran ils uauls dil reminent aunc buc aviarts cun vias forestalas. Culla gruppa ch'el ha giu a disposiziun e cun sustegn digl inschignier forestal cantunal ha el saviu entscheiver a realisar toc per toc. Oz ha il survetsch forestal a disposiziun ina reit ch'ei indispensabla per saver tgirar in uaul cun tala structura difficila.

En tut quels onns ha il plan da menaschi adina previu tagls annuals da 3300 cubics. Tochen avon dus onns ha Sigi Andreoli organisau quels culla gruppa ni cun interpresas forestalas. Suenter ils onns stentus cun baghegiar si l'infrastructura ed optimar la cultivaziun ha ei puspei dau midadas. Sco president communal da Ladir eis el vegnius confruntaus cun reorganisaziuns, quella gada politicas. Per l'efficienza e per saver esser aviarts per novaziuns havevan las vischnauncas ed igl Uffeci forestal cantunal decidiu ils 2011 da sligiar la gruppa forestala. El medem mument ha il project da fusiun da Glion entschiet. Fertun che Ladir era cumpiglius el project han Falera e Schluein vuliu prender in'otra direcziun. Igl ei stau da preveser ch'il Revier forestal Ladir vegn dividius e cunquei era sligiaus suenter 25 onns.

Cugl 1. da schaner 2014 ha il selvicultur e davos president communal da Ladir retschert ina nova incumbensa enteifer il survetsch forestal dalla nova vischnaunca Ilanz/Glion. Las autori-

tads da Falera e Schluein han buca schau ir Sigi Andreoli senza undrar specialmein el. L'jamna vargada ha ina sera da cumiau giu liug ella Casa Crusch a Ladir ed a caschun da quella ha il president communal da Falera, *Wendelin Casutt*, puntuau la buna collaboraziun. Tgi che hagi giu da far cun Sigi Andreoli en quels onns hagi schazegiau sia moda e maniera nuncumplidada e professiunala. Il president da Falera ha cunzun dau vinavon il pareri dils purs. En num dad omisduas autoritads ha il president communal da Schluein, *Bruno Wellinger*, surdau al meriteivel selvicultur in schenghetg en fuorma d'in bon e reconuschiu siu engaschi pils uauls da Ladir, Falera e Schluein.

reclama

**Für mehr Lebensqualität ohne Ausgrenzung.**

**NEIN zur SVP-Abschottungsinitiative!**

**JEDE STIMME ZÄHLT - JETZT ABSTIMMEN!**

Abstimmung vom 9. Februar 2014

**GRÜNE**  
Grüne Partei der Schweiz



Presidents communalas e geraus d'uaul da Falera e Schluein han undrau specialme in il selvicultur: Oliver Darms e Wendelin Casutt (seniester), Sigi Andreoli, Bruno Wellinger e Roman Holderegger (dretg).

FOTO A. BEELI